

Inatsisartut suleriaasianni § 33 naapertorlugu tulliuuttumi aalajangiiffigisassatut siunnersuut, Naalakkersuisut matumuuna saqqummiuppaat:

Nunat assigiinngitsut akornanni timmisartuni atortussiatigut isumannaatsuunissamik pisinnaatitaaffeqarnermut inatsisip Kalaallit Nunaanni atuutilersinneqarnissaanik peqqussummik Kalaallit Nunaanni Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut

(Ineqarnermut Attaveqaasersuutinullu Naalakkersuisoq)

1. Peqqutaasoq

Lov nr. 573 af 4. maj 2015 om internationale sikkerhedsrettigheder i flymateriel (Timmisartuni atortussiatigut isumannaatsuunissamik pisinnaatitaaffeqarnissaq pillugu Inatsit nr. 573, 4. maj 2015-imeersoq) Kalaallit Nunaanni atortuulersinneqassasoq, Naalakkersuisut siornatigut noqqaassutiginikuuat. Atortuni ingerlasinnaasuni nunat tamalaat akornanni isumannaatsuunissamik pisinnaatitaaffeqarnek pillugu 16. november 2001-imi Det Internationale Institut for Ensartet Privatret (naalisarlugu UNIDROIT) isumaqatigiissutaanut Kalaallit Nunaata ilaanissaa Inatsisip qulakkiissavaa. Taanna Cape Town-isumaqatigiissummik aamma taaneqartarpoq. Timmisartut atortuunut tunngatillugu, timmisartuni atortussianut allassimaffimmik taasamik, isumaqatigiissutip ulluattut ulloqartumik isumaqatigiissummut atasumik allassimaffeqarpoq.

Kalaallit Nunaanni silaannakkut angallassisartut Cape Town-isumaqatigiissummut ilaalernissartik aamma kissaatiginikuuat.

2. Peqqussutip imarisaa

Nunat tamalaat akornanni assigiiaamik inatsisitigut sinaakkuteqartitsinissaq, Cape Town-isumaqatigiissutip, tassungalu atalluni allassimaffiup pingaarnertut siunertaraat.

Timmisartuni atortussianik pisinermut, aningaasaliinermullu atatillugu aningaasaliisut isumannaatsuunissamik pisinnaatitaaffiisa (assersuutigalugu qularnaveeqqusiinermi pisinnaatitaaffiisa) illersorneqarnissaat isumaqatigiissutip siunertaraa.

Timmisartuni atortussianut aningaasaliinermut atatillugu aningaasaliisut qularnaveeqqusiussa at isumaqatigiissutitigut illersorneqartarput. Tamanna qulimiguulinnut, suluusalinnullu atuuppoq. Aningaasaliisup isumannaatsuunissamik pisinnaatitaaffimminik nunat tamalaat akornanni nalunaarsuiffimmi nalunaarsuisitsisinaanera iluaqutitaraa. Taamaalilluni nalunaarsuineq taanna timmisartuni atortussiami aningaasanik pisassalini allani salliutinneqassaaq.

Aningaasaliisup isumannaatsuunissamik pisinnaatitaaffini nunami pisinnaatitaaffinnut nalunaarsuiffimmut taamaallaat nalunaarsorsinnaappagit, tamanna illersorneqarnissap nalorninarneranik aningaasaliisumit misinnarsinnaavoq.

Cape Town-isumaqatigiissutip, allassimaffiullu annertussusaat

Massakut nunat 85-it isumaqatigiissummik atsiorsimapput, Danmarkilu 2016-imi atsiorluni. Taassumap saniatigut nunat eqqaamiut soorlu USA, Canada Islandilu aamma atsiornikuupput.

Isumaqatigiissut allassimaffillu timmisartuni atortussiatigut isumannaatsuunissamik pisinnaatitaaffeqarnermut Inatsimmut ilaatillugit, tak. § 1, Danmarkimi akuersissutigineqarput.

Danmark EU-mut ilaasortaammat, isumaqatigiissummi immikkoortut ilaat Danmarkimi atulersinneqanngillat. Kalaallit Nunaat EU-mut ilaasortaangimmat, eqqartuussivimmut tunngatillugu (aaqqiagiinngissuteqassappat nunami sumi eqqartuussivitsigut suliarineqassanersoq) nammineq qinigassaralugu isumaqatigiissummi aalajangersagaq Kalaallit Nunaannut malittarisassiuunneqassaaq.

Kalaallit Nunaat Rom-isumaqatigiissummut ilaammat, isumaqatigiissummi immikkoortoq 8 Danmarkimisulli Kalaallit Nunaannut malittarisassiuunneqassanngilaq.

Atuutilernissaa:

Aalajangiiffigissassatut siunnersuut manna Inatsisartut akuersissutigissappassuk, Kalaallit Nunaata Cape Town-isumaqatigiissummut, tassungalugu atalluni allassimaffimmut ilaalernissaanut iliuuserineqartariaqartut Danmarkimi Naalakkersuisut isumagissavaat.

Aningaasaqarnikkut allaffissornikkullu pisortanut kingunerisinnaasai
Soqanngilaq.

Aningaasaqarnikkut allaffissornikkullu namminersorlutik inuutissarsiutilinnut kingunerisinnaasai

Kalaallit Nunaanni timmisartortitseqatigiit timmisartuni atortussianik nutaanik pisinissami aningaasalersornissaannut periarfissaannut pitsaasumik kinguneqassanngatinnearpoq.

Aningaasaqarnikkut allaffissornikkullu innuttaasunut kingunerisinnaasai
Soqanngilaq.

Tusarniaaneq

Tusarniaaneq Justitsministeriap ingerlappaa, tusarniaaffigineqartullu allattorsimaffiat ilanngussatut ilanngunneqarluni. Allannguisoqarnissaanik kinguneqartunik, tusarniutigineqarnerani akissutinik tigusisoqanngilaq.